

RI WUJ XUTZ'IB'AJ RI JEREMI'AS

Keb' oxib' tzij puwi' ri wuj xutz'ib'aj ri Jeremias

Are wa' ri uk'isb'al ri uwuj ri B'aruk. We tzij ri' kutz'ilaj ri jetaq jo's dyos. We wuj ri' are kraj kutz'ib'aj jun wuj jeri' jacha ri xutz'ib'aj ri Jeremias 29 aretaq chi ri Jeremias xe'utz'ib'aj ri ek'o pa ri Babilonia.

RI WUJ XUTZ'IB'AJ RI JEREMI'AS

Ri uwuj ri Jeremi'as

Uwuj ri Jeremi'as che xutaq ub'i chkech ri jachintaq kek'amik ub'i pa ri kaxlan tinimit B'ab'iloni'a rumal ri kajawinel ri e'ajb'ab'iloni'a, arech keta'maj ri jastaq che xub'ij ri Dyos chrech are'.

¹Rumal ri jetaq mak xib'an chuwach ri Dyos, ri ix ixtz'apatalik ri' kixk'am ub'ik pa ri B'ab'iloni'a, rumal ri Nab'ukodonosor, che kajawinel ri e'ajb'ab'iloni'a. ²Aretaq chi' kixopan pa ri B'ab'iloni'a, kixkanaj kan ri' chila' k'i taq q'ij e k'i taq junab', chi k'ate' wuqub' mayilq'ijsaq; q'axinaq chi aq'anoq we junab' ri', ri in kixinwesaj uloq ri' pa nimalaj utzil. ³Pa we kamik ri', pa ri B'ab'iloni'a ri ix kiwil na ri' nik'aj taq dyos che eb'anom ruk' saq pwaq, ruk' q'an pwaq e ruk' che', che ketelexik e che kexib'in chkech ri winaq che man kekojon ta chkech. ⁴Chiq'ila' b'a' iwib' ix! Mib'an ix jeri' jacha ri ekaxlan taq winaq, mixe'j b'a' iwib' chkiwach we jetaq dyos ri', ⁵aretaq chi' ke'iwilo ri winaq che ek'o chkiwach e chkij tajin kekiq'ijilaj. Chib'ij b'a' pa ri iwanima': «Xuwi ri at rajawaxik katqaq'ijilaj, Qajawxel». ⁶Rumal rech che ri anjel wech in kk'o'ji' ri' iwuk': ri are' krilij na ri' ri ik'aslemal.

⁷Rumal rech che ri kaq' ri jetaq dyos ri' jun ajchak xb'anowik, ri e'are' kne'b'a' ch'uqталik ri kij ruk' ri q'an pwaq e ri saq pwaq; man tzij taj edyos e man kekowin taj kech'awik. ⁸Jeri' nak'ut jacha chrech jun surmu'yalaj ali che kraj je'lik kka'yik, jeri' kkib'an e'are', kkik'ama' ri q'an pwaq e kkib'an ri wiqib'al kijolom ri jetaq kidyoses. ⁹K'o jun taq mul che ri chuchqajawib' kkelaq'aj ri q'an pwaq e ri saq pwaq chkech ri kidyos, arech kkisach ri are' pa ri rajawaxik chkech; xoquje' kkiya' ne chkech ri ixoqib' che ekech nim ch'utin che ek'o uloq ajsik. ¹⁰Kkiko'j katz'yaq ri jetaq kikidyos e jeri' jacha winaq keka'yik, ri jetaq kidyos che esaq pwaq, eq'an pwaq e eche'; k'atek'ut ri e'are' ma kuya taj che mata kepusurik e mata ketij rumal ri xjut; ¹¹kne'b'a' che xkiko'j jun kyaqalaj atz'yaq chkech, rajawaxik wi kkicha'j ri kiwach rumal ri ulew rech ri Nim Rachoch ri Dyos che ktzaq uloq pakiwi'. ¹²K'o ne lo jun che kruk'aj puq'ab' jun uch'ami'y jeri' jacha jun q'atb'altzij chrech ri tinimit, k'atek'ut man kkowin ta ri' kukamisaj jachin ri xb'anow k'ax chrech; ¹³jun chik k'o nelo pa rikyaq'ab' jun ch'ich' rech ch'o'j e jun ikaj, k'atek'uri' man kkowin taj kuto' rib' chuwach ri ch'o'j e chkiwach ri elaq'omab'. ¹⁴Chila' kkitk'ut wi che man edyos taj. Xa jek'uri', mixe'j iwib' chkiwach e'are'!

¹⁵Jeri' jacha ri laq che kukoj jun winaq, aretaq chi' kpaxik, man k'o ta chi upatan, jeri' kk'ulmataj kuk' ri jetaq edyos ri' aretaq chi' ke'okisaxik pa ri Nim Ja. ¹⁶Ri kiwoq'och nojinaq chech ri ulew che kuwa'lisaj ri kaqan ri winaq ke'ok ub'ik. ¹⁷Jeri' jacha kb'an chech jun winaq che ktz'apaxik rumal rech che xub'an k'ax chrech ri ajawinel, ktz'apixik ronojel ri jetaq uchi'ja jacha taqal chrij ri kamikal, jeri' kkib'an ri chuchqajawib', ko kkitz'apij ri rokb'al ri Rachoch we jetaq dyos ri', kkitz'apij ruk' uchi'ja, ruk' lawib'al e ruk' tak'b'al taq uchi'ja, rumal rech che kkixe'j kib' chkech ri elaq'omab' we ke'kelaq'aj ub'ik. ¹⁸Kkitzij jetaq chajb'al chkech, e are ne k'i chi na ri kkitzijo chuwach ri rajawaxik chkech e'are'. K'atek'ruri', we jetaq dyos ri' man k'o ta jun kekowin chrilik. ¹⁹Xoquje' ejeri' jacha ri tem rech ri Nim Ja, kb'ixik che chupam ri che' kitijom ri ixjut; ri ixjut kepaqi' uloq pulew, kekitij ri e'are' e kkitij ri katz'yaq e ri e'are' man kkina' taj weri'. ²⁰Ri kupalaj xaqarinaq rumal ri sib' che kpaqi' uloq pa Nim Ja. ²¹Puwi' ri kib'aqil e puwi' ri kijolom kerapap ri sotz', ri buq

e nik'aj taq chikop ajuwokaj chik; k'atek'uri', xoquje' ek'o nik'aj taq me's. ²²Ruk' weri', kiwilo che man edyos taj; mixe'j iwib' chkiwach.

²³Ri q'an pwaq che kokisax chkij arech je'lik kek'ayik; weta mata k'o jun winaq kusu' kij ma keqopaqatik ta ri', rumal rech che aretaq chi' xeb'anik man k'o ta jun xilowik ri tzi'l k'o chkij. ²⁴Sib'alaj nim ri pwaq xsach chkij we dyos ri' aretaq chi' xeloq'ik; k'atek'ut man k'o ta kuxlab'al rech k'aslemal kuk' e'are'. ²⁵Rumal rech che man k'o ta kaqan, kekitelej ub'ik, xa jek'uri' kkik'ut chkiwach ri winaq ri kik'ixb'al. Xoquje' k'ixb'al kekanaj kanoq ri epataninel chkech e'are', rumal rech che we xetzaq ub'i pulew, xas kewa'lasaxik na kumal ri e'are'. ²⁶We ketak'ab'ax kanoq man kekowin taj kesilob' kitukel; we keponb'ax kanoq man kekowin taj kewa'laj kitukel, k'atek'ut, jeri' na k'uri' jacha chkiwach kaminaqib' kokisax ri' ri jetaq sipanik.

²⁷Ri jetaq tab'al toq'ob' kya chkech, ri echuchqajawib' ke'ok che uk'ayixik e k'o ri kich'akoj ruk' weri'; xoquje' ri kixoqilal kkitzayij nik'aj taq ch'aqap arech kuq'i' na e man kkiya' ta jub'iq kech ri emeb'a'ib' e ri eyawab'ib'. Ri ixoqib' che k'ateri' xkil uwach ak'al, e ri ixoqib' che man ech'ajch'oj taj rumal ri kich'ajo'n, kkichaq' ri tab'al toq'ob'. ²⁸Chiweta'maj b'a ruk' ronojel weri' che man tzij taj edyos, mixib'ij b'a' iwib' chkiwach.

²⁹¿Jas k'u che ri' che edyoses kb'ix chkech? E'ixoqib' ri kekojon ri jetaq taq sipanik chkiwach we jetaq dyos ri' che esaq pwaq e eq'an pwaq e eche'. ³⁰Pa taq ri nim kachoch, ri echuchqajawib' et'uyt'uj chila' ruk' sama'y taq katz'yaq, ri sokam ri kijolom e kismachi', xoquje' ma kich'uqum ta ri kijolom; ³¹kkiraq kichi' e ko kech'aw chuwach ri jetaq kidyos, jeri' jacha kb'anik pa jun wa'im rech kaminaq. ³²Ri echuchqajawib' kkesaj ri katz'yaq ri kidyos e kkikoj chkech ri kixoqilal e chkech ri ekalk'uwa'l. ³³We k'o jun winaq kub'an k'ax on kub'an utzil chkech, man kekowin taj kkitzalij uk'axel chkech, xoquje' man kekowin taj kkikojo on kkesaj ub'ik jun ajawinel; ³⁴man kekowin taj kkiya q'inomal on kkiya q'an pwaq. We k'o jun winaq kujikib'a' ri utzij chkiwach, e man tzij taj kub'ano, man kekowin taj kkitoq'ij chrech arech kub'ano. ³⁵Man k'o ta jumul kekowinik kkikol jun winaq chuwach ri kamikal on che kkesaj ta ne' ri tuqa'r winaq puq'ab' ri ukowinem ri jun winaq che kub'an k'ax chrech, ³⁶man kekowintaj kkika'yisaj jun moy, on che kkito' ta ne' jun winaq che k'o pa ri k'ax, ³⁷on kkitoq'ob'isaj ta ne' uwach jun malka'n chichu', on kkib'an ta ne' utzil chrech jun minor. ³⁸Ri e'are' ejeri' jacha ri jetaq ab'aj che esam uloq pa taq ri juyub', chujala ub'ik ri ch'aqap taq che' che su'um kij ruk' q'an pwaq e saq pwaq. E ri epataninel chkech k'ixb'al kekanaj kanoq! ³⁹¿Jas ku ukojik ri' on jas k'u ub'ixik ri' che edyos?

⁴⁰Xoquje' ne', xas e'are' ri e'ajkalde'a kketzelaj kiwach, rumal rech che aretaq chi' kkil jun winaq che mem, man kkowin taj kch'awik, kkik'am ub'i we mem winaq ri' chuwach ri B'el e kkita' chrech arech loq' kch'aw we winaq, kb'an chrech ri dyos ri' jacha kkowinik kuta' weri'; ⁴¹e ri e'are' che kekowinik kechomanik, man kekowin taj kkiya kan we jetaq kidyos ri' che man k'o ta kichomab'al! ⁴²Ri ixoqib', eximitalik ruk' k'am, et'uyt'uj chuchi' taq b'e arech kkiporoj ri salwa't, jacha k'ok' q'ol chkiwach, ⁴³k'atek'uri', aretaq chi' jun chkech we ixoqib' ri', kb'e ruk' jun achi che q'axel chila' e kuta chrech kkotz'i' ruk', we ixoq ri' are ne kyajan chech ri uk'ulja rumal rech che xilik man taqal ta chrij utz ixoq jacha ri are' e rumal che man xt'oqopix ta ri uk'am jacha ri rech are'. ⁴⁴Ronojel ri jastaq che kb'an chkiq'ijilaxik ri man edyos taj, xa jun sub'unik ne'; ¿jas k'u ukojik ri' e jas ub'ixik ri' che edyos ri e'are'?

⁴⁵E'ajjosol che' e e'ajch'ayilch'ich' xeb'anow e'are', e jun jas uwach jacha ri xkaj ri xeb'anowik. ⁴⁶Ri jachintaq xeb'anowik, ri e'are' man naj ta ri kik'aslemal kk'o'ji'k; ¿la edyos k'uri' ri jastaq kkib'an ruk' kiq'ab'? ⁴⁷Xuwi ri man tzij taj e k'ixb'al kiya'om kan chkech ri kija'lil. ⁴⁸E aretaq chi' kpe ch'o'j chkij on kpe jun k'ax pakiwi', ri echuchqajawib' junam

kech'awik che uchomaxik jawi' kkik'u' kib' ruk' we jetaq dyos ri'; ⁴⁹¿jas k'u rumal ri' che man kilitaj taj che man tzij taj edyos rumal rech che ri man kekowin taj kkol kib' chuwach ri ch'o'j on chuwach ri k'ax? ⁵⁰We ch'aaqap taq che' ri' che su'um kij ruk' q'an pwaq e ruk' saq pwaq, xas kilitaj na ri' jun q'ij aq'anoq che man tzij taj edyos. Kq'alajinik ri' chkiwach konojel, chkiwach jetaq amaq' e chkiwach e'ajawinelab' che ri e'are' man tzij taj edyos, kq'alajinik ri' che xa uchak kiq'ab' winaq e che man k'o ta chkech e'are' jun uwach che uchak jun Dyos. ⁵¹¿Jachin jun winaq ri' che man q'alaj ta chuwach che ri e'are' man tzij taj edyos?

⁵²Man kekowin taj kkikoj jun ajawinel pa jun amaq' e man kekowin taj kkiya' ri jab' chkech ri winaq, ⁵³man kekowin taj kkib'an q'atb'altzij puwi' ri jetaq ch'o'j, xoquje' man kkito' ta uwach ri meb'a' pa ri k'axalaj chak; rumal rech che ri e'are' man k'o ta kikowinem, ejeri' jacha ri joj, ri e'are' ek'o panik'aj chrech ri kaj e chrech ri ulew. ⁵⁴We ri kachoch we taq dyos ri' che eb'anom ruk' q'an pwaq e saq pwaq, kportaj ub'ik rumal ri q'aq', ri echuchqajawib' ke'animaj ub'i ri' chuwach ri q'aq' arech kekoltajik, k'atek'ut ri edyoses ri' jacha eraqan ja ri' kkib'an kanoq e kek'at ub'i ri' pa ri q'aq'. ⁵⁵Xoquje' man kekowin ta ri' kech'o'jin ruk' jun ajawinel on kuk' ri ek'ulel. ⁵⁶¿Jas k'u che kchomxik che edyos?

⁵⁷We taq edyos ri', che eb'anom ruk' q'an pwaq, saq pwaq e ruk' che', man kekowin taj ke'animaj chkiwach ri elaq'omab' e chkiwach ri winaq che eb'anal taq k'ax; we elaq'omab' ri' k'o kichuq'ab' chkiwach e'are', kkitoqij ub'i ri q'an pwaq e ri saq pwaq k'o kuk', kkijol b'i ri taq ka- tz'yaq chkij e kkik'am ub'ik; e ri e'are' man kekowin taj kkito' kib' chkiwah. ⁵⁸Chuwach weri' are utz ri' jun ajawinel chuwach, rumal rech che ri ajawinel kuk'ut ri uchuq'ab' on jun laq che k'o pa ja are utz chkiwach, are ne kub'an ri uchak upatan pa uq'ab' ri rajaw chkiwach we edyos ri' che man tzij taj edyos; on are ne utz chkiwach we man tzij taj edyoses ri' jun uchi'ja che kuto' uwach ronojel ri jastaq k'o chupan ri ja; on jun raqan ja che k'o pa nimja, chkiwach we man tzij taj edyos ri'. ⁵⁹Ri q'ij, ri ik' e ri jetaq ch'imil kech'ub'lin chikaj k'o kipatan e are kenimanik; ⁶⁰xoquje' ri kuypa' aretaq chi' kq'alajinik, je'lik kka'yik; xoquje' ri kyaqiq' kajumumik pa ronojel amaq', ⁶¹ri sutz', aretaq chi' ktaqan ri Dyos chrech che kutzalij ronojel ri uwachulew, chanim knimanik, e ri q'aq' che petinaq uloq chikaj arech ku't'iq'a' ri jetaq juyub' e ri jetaq k'ache'laj, sas kub'an wi ri xtaq uloq chrech. ⁶²K'atek'uri', we edyos ri', man kuya taj kejunamtasaxik ruk' we jastaq ri', ruk' ri keka'yik e ruk' ri kikowinem. ⁶³Rumal k'uwa' weri', jun winaq man kuya taj kuchomaj on kujikib'a' ub'ixik che edyos ri e'are', xane ri e'are' man kekowin taj kkib'an jun q'atojtzij on kkib'an utzil chkech ri winaq. ⁶⁴Iweta'm chi anak'ut ri' che man edyos taj, mixib'ij b'a' iwib' chkiwach!

⁶⁵Xoqje' man kekowin taj kekikyaqsaqarisaj on kekitewchi'j ri e'ajawinelab', ⁶⁶on che kkik'ut ta ne' chkiwach ri jetaq amaq' jujun taq k'utb'al pa ri kaj; man kech'ub'lin taj jacha ri q'ij e ma kkiya' ta ri saqil jacha ri ik'. ⁶⁷Ri jetaq awaj are e'utz chkiwach ri e'are', kekowinik kkik'ol kib' pa jun panib'al che uto'ik kib'. ⁶⁸Man k'o ta q'alaj wi che e'are' edyos, mixib'ij b'a' iwib' chkiwach!

⁶⁹Ri e'are' ejeri' jacha epoy pa jun tikb'al q'oq', che man k'o ta kechajinik, ejewa' we kidyos ri' che eb'anom ruk' q'an pwaq e saq pwaq. ⁷⁰Xoquje', ri kidyos che eb'anom ruk' q'an pwaq e saq pwaq kejunamtasaxik ruk' jun uche'al k'ix k'o pa jun utzalaj ulew, che kepe uloq e kechaki' puwi' ek'i chikop ajuwokaj, on kejunamtasaxik ruk' jun kaminaq che wonob'am kanoq pa ri q'equ'm. ⁷¹Rumal ri kyaq tuntuj e ri lino che kq'iyik chkij, kiwil na ri' che man edyos taj. Pa uk'isb'al kek'uxtaj ub'i ri' rumal ri intaq ixjut, jun k'ixb'al wa chrech ri amaq'. ⁷²Are sib'alaj nim ub'antajik ri' ri winaq che suk' winaq, che man ek'o ta ejo's taq dyos ruk'; ri are' man k'o ta uk'ixb'al ri' kresaj na.